

COMUNICATO n. 1650 del 14/06/2025

Manà fora su Trentino Tv l program l vegn endrezà dal Comun General de Fascia

“Pedies”: per en sabeda ai 14 de jugn vegn fora la puntata #490 del program ladin per la televizion

[Ladino] Ence chesta setemèna l é a la leta l nef apuntament de “Pedies”, rotocalch ladin de informazion, ruà a la puntata n. 490.

I argomenc de chesta setemèna l é:

Na scontrèda per rejonèr endò de Ladin Standard. L Istitut Cultural Majon di Fascegn l à endrezà n moment de confront interladin per tor dant la costion linguistica leèda al davegnir del ladin e per entener se l ladin standard l pel esser de didament. Per l’ocajion l è stat portà dant referac da pèrt de Vittorio dell’Aquila, André Comploi e Nadia Chiocchetti. Chesta costion tel passà l’aea soscedà ence polemiches ma ades i tempes i podessa esser matures per fèr neves vèresc inant.

L grop di studafech de Soraga l à arjont n travert emportant, più avisa i 70 egn da sia fondazion. Per l’ocajion l è stat fat na Messa aposta col Piovan don Andrea Malfatti che dapodò l à ence benedì l meso nef de polisocors endotà de enjignes e èrc modergn per poder ge fèr front a ogne sort de intervent. Tinultima l é stat endrezà na bela festa te Pra del Preve a chela che à tout pèrt duta la comunanza.

Tel chèder de la scomenzadives metudes a jir per l’Aisciuda Ladina 2025, la Scola Ladina de Fascia l’ à endrezà desvalives projec entornvia la toponomastica, che l era l argument de chesta edizion. Con Pedies sion jic a se fèr contèr più avisa de che che l è stat fat e endrezà da pèrt di dozenc e di studenc de la scoles mesènes e di licees.

I report de chesta setemèna, enjigné da Riccardo Zanoner e Sabrina Riz, i vegn porté dant co la ousc de Sabrina Riz.

Metù a jir col sostegn del Comun General de Fascia, de la Provinzia autonoma de Trent e de la Region autonoma Trentin – Südtirol, “Pedies” l va fora su **Trentino Tv – canal 10 Prov. de TN**- vigni sabeda da les 18.00 (sie da sera), de domenia da les 13.30 (mesa la does domesdì) e de lunesc da les 11.30 (mesa les doudesc).

L program ades l va fora ence sun **AltoAdige TV – canal 11 de BZ** - vigni domenia da les 18.00 (sie da sera).

Se pel veder duta la puntates ence sul canal YouTube de TV Ladina sot chest link:

<https://www.youtube.com/@TvLadina>

opuramenter se pel veder i servijes un a un su la piata Facebook de TV Ladina.

<https://www.facebook.com/TelevizionLadina>

(us)

